

10/07/2024

Aizawl

1830 Hrs

## REGIONAL NEWS

### HEADLINES:-

1. Hortoki bul Tlawng luiah Vawk thi ruang engemawzat hmuh a ni.
2. Vawiin chhun atang khan lirthei te chi tlan tlang theihin Lengpui Airport road hawn a ni.
3. Austria-a cham mek Prime Minister Narendra Modia chuan vawiin khan Austrian Chancellor Karl Nehammer nen Vienna ah an inkawm.
4. State pasariha Assembly bial 13 ah vawiin khan By-election neih a ni.

<><><>

### ASF

Tukin khan Hortoki bul Tlawng luiah Tlawng hnar lam atanga leng thla Vawk thi ruang hmuh ani a, Vawk thi hi kar kalta tawp lam ah pawh hmuh anih tawh thu Pu Zoramthara, Hortoki Vawk Vulh Assn President chuan Kolasib a Akasvani corr a hrih.

Tunkar thawhlehi khan Hortoki khaw mi Tlawng hnar lama hnathawka kal te chuan Vawk thi (ruang) hi 7 vel an hmu niin thudawna pakhat chuan a sawi a. Vawk thi an hmuh tawh zawng zawng hi 10 vel anih an rin thu an sawi a ni.

Tlawng hnar lam atanga Vawk thi len thlak te hi Hortoki khaw kai-ah a tangkhan loh nan Mau tlawn in lui mawng lamah hawlth thlak ani thin a, tui in lui mawng lamah a len thla zel niin thudawna chuan a sawi. Hetiang hi thil awmdan anih avangin Lui mawng lama chengte an fimkhur a ngai hle a. Tun dinhmunah Vawk thi te hi a paihtu hriat ani rihlo.

Hortoki Vawk Vulh Association President Pu Zoramthara chuan, Tlawng luia Vawk thi len thlak chungchang ah hian Mizoram Pig Farmer Assn President hnenah thil awmdan phone hmanga hrih in, Vawk thi thlak thenkhat pawh a thawn tawh thu Kolasib a Akasvani corr a hrih a. Hemi bawhzui hian Mizoram Pig Farmer Assn hruaitute chuan Sairang Police Station ah FIR an thehluh ni a hriat ani baw.

Vawiin khan Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 106 thiin vawk 218 suat a ni a.

ASF vang hian Mizoramah kumin January thla atanga vawiin thleng khan vawk 5427 thi nia report a ni a, vawk suat tawh zawng zawng hi vawk 10258 a ni tawh a. Vawiin bika vawk thi zat hi Aizawl District ah vawk 55 a ni a, Serchhip District ah vawk 50 leh Kolasib District ah vawk 1 a ni a. Tihian vawiina Mizoram chhunga vawk thi zat hi vawk 106 a ni a.

Vawiin vek khan Mizoram chhungah vawk 218 suat a ni a. Aizawl District ah vawk 144 suat a ni a, Serchhip District ah vawk 52, Kolasib District ah vawk 4 leh Khawzawl District ah vawk 18 suat a ni baw a ni.

Khawzawl District chu District Magistrate in nimin atang khan Infected Area ah a puang a . District Magistrate in thupek a tihchhuah tharah chuan Khawzawl District chhungah i ram chhung leh pawn leh District dang atangtein Vawk leh vawksa atanga thil siam lak luh khap a ni a, Vawk dam lo talh leh hralh khap niin Vawk dam lo reng reng dah hran a, Vawk thi chu thuk taka phumbo tur a tih a ni a. Khawzawl District chhung khua leh khua inkarah Vawk lak khap a ni a. Tualchhung vawk talh tur reng rengin vawk hrisel tha ngei a ni tih finfiahna thuneitu atangin an nei tur a ni. Thupek hian nimin atanga thla 2 chhung a huam dawn a ni.

<><><>

#### MPCC PARTY PRESS CONF

Mizoram Pradesh Congress Committee Senior Vice President Pu Lalnunmawia Chuaungo chuan ZPM sorkar in Mizoram Lok Ayukta in rawtna a siam phawt chuan, Mizoram sorkar phalna a hranpaa lak kher ngai lova CBI chhui phalna a pek an phut tih a sawi.

Vawiina MPCC Vigilance Cell-in Aizawl Press Club-a chanchinbu mite an kawmnaah he thu hi sawiin Pu Lalnunmawia Chuaungo chuan, Chief Minister chuan Mizorama corruption a nasat thu leh chumi do tura CBI an koh luh tur thu mipuite hmaah vawi duai lo a lo sawi tawh, a ti a. ZPM sorkar hlim December ni 23, 2023 khan Gazette Notification chhuahin CBI-in Mizoram chhunga investigation an tih theih nan phalna pek a ni a. Amaherawh chu, CBI Director lehkha kumin June ni 20 ami chu chhuanlama hmangin Gazette Notification thar, tun thla ni 1-ah tih chhuah a ni leh ta a, hetah hian hnu chhui turin CBI chuan Mizoram sorkar phalna a lak kher a ngai tih a ni a, hetiangana hun reilote chhunga an thu an zuk chhan hi thil 2 a awm thei a ni a ti a, ZPM sorkar chuan ngaihtuahna fim hmang lovin, mipui leh Assembly House a Chief Minister thusawi kalhin CBI Director in state tin Chief Secy te hnena consent pekna tur a duansa chu a ngai ngaiin an pawm ringawt a ni thei a, hemi a nih loh vek chuan ZPM sorkar chu corruption lakah a fihlim lo a ni tih vangtlang hriata sawi a nasat em avangin CBI Director lehkha hi chhuanlama hmangin CBI tana general consent pek chu an tan a him lo a, a hlauhawm an tih tak vang a ni thei bawk a ni a ti.

Pu Lalnunmawia chuan central sorkar hnuaiia thawkte chauh chhui thei tura CBI hnena consent pek hian Mizoram mipuite beiseina leh duh dan a ti hlawhtling lova ZPM intiamna a ti hlawhtling bawk hek lo a ti a, Central sawrkar hnuaiia thawkte bakah Mizoram Lokayukta-in rawtna a siam a nih phawt chuan Mizoram sawrkar hnuaiia thawkte, Mizoram sawrkar phalna a hranpaa lak kher ngai lova chhui thei tura CBI hnena general consent pekna Gazette Notification chhuah turin Chief Minister Pu Lalduhoma leh a kahruai sorkar chu an phutin an ngen a ni, a ti.

<><><>

#### AIRPORT ROAD

Vawiin chhun atang khan lirthei te chi tlan tlang theihin Lengpui Airport road hawn a ni tih PWD chuan a sawi.

PWD lam chuan lirthei te chi tal kal thei turin tukin atang khan thawkin, lungin side drain an hnawh a, chhun dar 12:30 velah an hawng thei ta a ni.

PWD hotute chuan lungfûn hmanga kawng chhuat bal thuam tha turin hma lak tan nghal a ni an ti a. Lung funna GI wire net hi henglaiah a quality tha a awm mai lova Silcharah chah a ni a, naktukah chuan a lo thlen hman beisei a nih thu leh Hna thawh chhung chu Medium leh Heavy vehicles te chu Buichalli bridge lamah la kal zel tur a ni an ti bawk a ni.

Tun dinhmunah Kawng chhuat bal chu CE hovin an zirchiang mek a, Rang zawka lirthei lian chi tan pawh kal theih nan siam tuma ruahman dan an zirchiang mek a ni.

<><><>

#### LADC

Lai Autonomous District Council Emergency Session nithumna vawiin a LADC Session Hall, Lawngtlai a neih ah Deputy Chairman atan Pu H.Lalmuansanga Tuithumhna bialtu MDC thlan a ni a, Deputy Chairman thlan dawn hian ZPM Member ten House an chhuahsan.

LADC a Deputy Chairman Pu C.L.Lianzuala chuan Thawhtanni khan banna Chairman hnenah a thelut a, Pu C.L.Lianzuala hi tunhnaia Member dang pariat nen ZPM zawmtu zingah telin, tuna Congress leh MNF Sorkar intawmah Deputy Chairman nihzui chu thiltihawm ni a ngaih a nihloh vanga bang a ni a, nimin tlai dar 3 thleng khan Deputy Chairman chuhtum tana hming pekluhtheih niin, vawiin Session ah Chairman Pu V.L.Hmuaka chuan chuhtu dang awmlovin Deputy Chairman tan Pu H.Lalmuansanga thlan a nih thu a puang a ni.

Deputy Chairman thlanna neih dawn hian eptu lam ZPM Member te chuan Deputy Chairman thlanna neihdan ah thil felhleh a awm ni a hriain, House an chhuahsan a.

Opposition Leader Pu K.Hre Kung chuan vawiin vek khan ZPM Office Bazar veng Lawngtlai ah thuthar thehdarhtute kawmin, Deputy Chairman thlanna neitur chuan hriattirna chhuah leh inthlan hun inkarah Ni hnih tal a tlatur a ni tih dan dinglai a awm laiin, hmanhmawh leh chawpchilh takin, lehkha pawh eptu member ten an hmuhkim hmain Deputy Chairman thlanna neih a ni a ti a, hei hi LADC Dan dinglai palzutna ni a an ngaih vanga House chhuahsan an nih thu a sawi a, eptu lam hruaitu a nih angin nimin lamah pawh Chairman hnenah Deputy Chairman thlan hun chu dan bawhchhelo zawnga kalpui tura a lo ngen tawh thu leh zawm erawh a hlawh talo tih Pu K.Hre Kung chuan a sawi bawk.

<><><>

#### SAGY

District Level Committee on Sansad Adarsh Gram Yojana (SAGY) Phase IV, Muallungthu khua leh Phase V, Ratu khua chu vawiin khan Aizawlah MP Lok Sabha Pu Richard Vanlalhmangaiha leh MP Rajya Sabha Pu K. Vanlalvena te hovin an thukhawm a. Heng khua - model village pahniha hmasawna hnathawh tur lo duan lawk tawh 'Village Development Plan' bawhzui dan leh an tun dinhmun te sawiho a ni.

Ratu khua hi Rajya Sabha MP Pu K. Vanlalvena'n Model Village a thlan zing ami a ni a. Hmasawna hna hrang hrang 32 chu department sawm chuangin an thawh tur Village Development Plan hnuaihan dah niin, chung zinga 18 chu zawh fel tawh a ni.

Muallungthu hi Lok Sabha MP hmasa Pu C. Lalrosanga'n Model Village atana a thlan zing a mi a ni a. Village Development Plan hnuaihanathawh

tur hrang hrang sawmnga chuang duanchhuah atangin zaa 71 zawhfel tawh a ni.

Vawiin meeting-ah hian MP te chuan hnathawh hmabak la awm te chu a rang lama bawhzui turin department aiawhte chu an chah a. Hnathawh zawh tawh a nih chuan report pek vat thin npawimawh an tih thu an sawi bawk.

SAGY hmalakna hnuaiah hian MP te'n Model Village atan an duh khua an thlang thin a. Chung Model Village-ah chuan khawtlang mamawh leh tulte sawiho in Village Development Plan te duan a ni a. Chu Plan chu tihlawhtling turin Line department hrang hrangte thawhhona hnuaiah hmalak thin a ni.

<><><>

### PM

Austria-a cham mek Prime Minister Narendra Modia chuan vawiin khan Austrian Chancellor Karl Nehammer nen Vienna ah an inkawm a. India leh Austria inkara thawhdunna leh thil pawimawh dang tam tak an sawidun. hruaitu pahnihte hian sumdawanna leh investment te, Science leh Technology te, green energy, AI, start-up, environment leh sik leh sa inthlak chungchangte, mipui hnam ziarang inhriatpawh tawn leh mipuite inpawhna lam hawi te an sawidun a. Ram pahnih inkar bakah khawvel thil thleng pawimawh te an sawi dun bawk a ni.

Prime Minister Narendra Modia chuan a thuchhuah siamah khawvel mihringte tana chona lian ber tuna khawvelin a tawn mekte an sawidun a. Heng zingah hian sik leh sa inthlak nasa leh firfiaka chetna te pawh a tel a ti a. Austria chu International Solar Alliance, Collision for Disaster Resilient Infrastructure leh Bio-fuel Alliance ah te tel ve turin a sawm nghal a. Ukraine buaina leh Asia thlang lama buaina thleng mekte sawidunin Pu Modia chuan indo hun anih tawh loh thu a sawi lang a ni a ti.

Prime Minister hi Vienna-ah sawrkar chawimawina famkim nen ropui taka lo hmuah a ni a. India mi cheng thahnem takin an lo hmuak bawk a. Kum 41 hnua India Prime Minister zinga Austria tlawh leh hmasa ber a ni a. Austria President Alexander Van der Bellen nen an inkawm dawn bawk a. India mi chengte hmaah thu a sawi bawk ang.

<><><>

### ASSEMBLY

State pasariha Assembly bial 13 ah vawiin khan By-election neih a ni. Inthlan buatsaihna te hi West Bengal, Punjab, Bihar, Tamil Nadu, Madhya Pradesh, Uttarakhand leh Himachal Pradesh te an ni a. Zing dar 7 khan vote thlak tan a ni a. Vote tla te hi tun thla ni 13 ah chhiar a ni ang.

Hetihlai hian vawiin khan Electon Commission team mi paruk awmna chuan Jharkhand khawpui Ranchi an thleng a. He team hi Senior Deputy Electioni Commissioner Nitesh Vyas leh Dharmendra Sharma ten an ho a. Jharkhand Assembly inthlan atana inbuatsaihna te an thlirho a. Kumin kumtawpah Jharkhand ah hian inthlan buatsaih a ni ang.

<><><>